

Januari 1

Tunaitwa Wana wa Mungu

Tazameni, ni pendo la namna gani alilotupa Baba, kwamba tuitwe wana wa Mungu; na ndivyo tulivyo. Kwa sababu hii ulimwengu haututambui, kwa kuwa haukumtambua yeye—**1Yohana 3:1**.

Yohana alipokuwa akiutafakari upendo wa Yesu, aliongozwa kutangaza, “Tazameni, ni pendo la namna gani alilotupa Baba, kwamba tuitwe wana wa Mungu.”

Watu wanafikiri kuwa ni upendeleo kumwona mtu wa familia ya kifalme na maelfu wanasafiri umbali mrefu ili kukutana nao. Ni upendeleo mkubwa kiasi gani kuwa wana na binti za Mungu aliye hai. Je! kuna upendeleo mkubwa kiasi gani zaidi ya kutunukiwa na kupewa nafasi ya kuingia katika familia ya kifalme? Ili kuwa wana na binti za Mungu, lazima tujitenge na ulimwengu. “Tokeni kati yao, Mkatengwe nao, Msiguse kitu kilicho kichafu,” asema Bwana, “Nami Nitakuwa Baba kwenu, Nanyi mtakuwa kwangu wanangu wa kiume na wa kike.” ...

Kuna mbingu mbele yetu, na taji ya uzima kujipatia. Lakini zawadi hii inatolewa kwa washindi tu. Yeye aipataye mbingu lazima avikwe vazi la haki. “Na kila mwenye matumaini haya katika Yeye hujitakasa, kama Yeye alivyo mtakatifu.” Katika tabia ya Yesu hakukuwa na ukinzani wa aina yeyote. Na huu lazima uwe ndio uzoefu wetu. Lazima maisha yetu yatawaliwe na kanuni ambazo zilitawala maisha Yake.

Kwa njia ya ukamilifu wa kafara iliyotolewa kwa ajili ya jamii yenye hatia, wale wanaomwamini Yesu, wakimjia Yeye, wanaweza kuokolewa kutoka kwenye uharibifu wa milele...

Hebu mtu awaye yote asidanganywe na adui hata kufikiri kwamba ni kujishusha hadhi kwa mtu yeyote, haidhuru ana kipawa, au ni msomi, au mheshimiwa kiasi gani, kumkubali Yesu. Kila mwanadamu anapaswa kuangalia mbinguni kwa kicho na shukrani na kutangaza kwa hali ya kustaajibishwa, “Tazameni, ni pendo la namna gani alilotupa Baba, kwamba tuitwe wana wa Mungu.”